



Minggu, 21 Agustus 2022
Ogen: Nehemia 2:20



Pesikap Kuta Kemulihen



Seseorang mencintai negaranya bukan karena negaranya hebat tetapi karena itu adalah milik mereka sendiri. Enda sada kalimat si ibelasken Seneca kerna nilai-nilai ras keleng ate nandangi negarana. Payo kal, banci hebaten kal bangsa sideban, belinen kuasana, gegehken tenterana, jilen ras majun masyarakatna. Tapi labo banci si bangga-banggaken, sabap labo sitik pe lit hak ras asamta i je. Ntah kuga gia kecibal bangsa ras inganta tading, banggalah, alu ikut mpehulikenca, mbangunca, sabap e inganta tading, kutanta, taneh ras launa simpebelin kita, udarana si jadikan kita erkesah. Bagenda me keleng ate Nehemia nandangi taneh kemulihenna. Ija kenca mulih ia ipembuangan nari ersura-sura ia mbangun mulihe kutana. I bas sura-surana si mehuli e kepe igombangi ras i tawai kalak sideban ia (2:18). Ituduh ia ersura-sura ngelawan raja. Kepeken i bas sura-sura mbangun mulihi taneh kemulihenna, la sitik tantangan sitentuna la saja arah bangsana jine tapi pe kalak sideban si lit i sekelewetna, si mapas nandangi ia. Njabab sie maka i bas gelar Tuhan ia kerina si pasu-pasu dengen seh sura-surana mbangunsa. I bas sie la lit sitik pe hak ras kuasa kalak sideban. Nehemia, la mbiar, la surut i bas sura-sura si mehuli e.

Indonesia, negeri si mehuli, si ibere Tuhan jadi inganta tading. Negeri si arus si pekena, si bangun ras si totoken gelah kerina rayatna si tading i je ngenanami kiniulin, kesejahteran geluh. Enda me taneh si 'warisken' kita man anak kempunta, generasi si selanjutna. Mari si pesikap negerita, si pekena kuta kemulihenta. Dahin enda tanggungjababta selaku warga Negara Indonesia, selaku kalak si erkiniteken si nggejabken pemere ras pasu-pasu DIbata taneh e jadi inganta nggeluh. Kelengi, ergai negerinta alu mpekena-kenasa alu mehuli.